

Saturday, April 4, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

HEROIN HAUL

Champhai district Police te chuan tun thla ni 3 chhung khan heroin kg 2 leh gram 402, cheng vaibelchhe 4 leh nuai 76 chuang hu zet an man.

Mizoram sorkarin 'Operation Jericho' hming vuaha ruihhlo do beihpui a thlak hun pawhsei a tawp ni, March ni 31 hnu atangin ruihhlo tam tham tak a lo lut leh ni a thu dawn a ni a, nimin pawh khan Champhai district Police-te chuan Chalbawia Junction, Khankawn Police Check Gate-ah car pakhat atangin heroin kg 1 leh gram 860 an man a. He ruihhlo, cheng vaibelchhe 3 leh nuai 72 hu a chhut car a phurtu Zothangpuia (34), Khawmawi khua, Myanmar, tuna Zokhawthara awm mek leh a car a chuang Hawiliankhupa (23) Tongpila khua Myanmar, tuna Melbuk khua a awm mekte chu an man a. Champhai Police Station-ah Narcotic Drugs & Psychotropic Substances Act, 1985 section 21(c)/25/29 bakah Immigration and Foreigners Act, 2025 section 21 hmanga thubuai ziahluh a ni.

Thu zawhfiahna-ah he ruihhlo thawntu ni a rinhlelh Lalneihthanga(32) Chekan khua, tuna Khawmawi khua Myanmar a awm mek chu Police te hian an mi mante hmanga bum chhuakin Champhai Zotlangah an man a. Ani rual hian a tiam rualpui Laltanpuia(36) Chekan khua, Myanmar, tuna Zokhawthar khua a awm mek pawh an man tel bawk.

He mi hma Nilaini, April ni 1 zan khan Champhai district Police te vek hian Zokhawthar Presbyterian Kohhran biak-in bulah heroin gram 247 manin a neitu a puh Zokhawthar a khawsa mek Vanlalchhuanga (30), Letpanchhawng, Kalemmyo District, Myanmar chu an man a. Zokhawthar Police Station-ah hrengin thubuai ziahluh a ni a. April ni 1 vek hian Chalbawia Junction, Khankawn Police Check Gate-ah heroin gram 231 leh a neitu a puh, ruihhlo phurhna car khalhtu Ashifur Rahman (28) leh Jamrul Hoque Khan (26) Karimganj district, Assam a cheng ve vete chu man an ni a. Hemi ni vek chawhnu lamah Chhungte khaw chung kawng peng thumamah Champhai Kahrawt veng cheng Lalduhkima (52) chu a hroin kawng gram 46 nen man a ni bawk.

Puan tawh angin Excise & Narcotics department hnathawkte pawhin Nilaini vek khan Kolasib Khuangpuilam-ah Heroin Kg 1 & gram 252 an lo man tawh bawk a. Manipur atanga heroin rawn phur thlatu 2 an man zinga pakhat hi Manipur Police department a thawk lai mek a ni.



WEATHER

Indian Metereological Department Director Pu Sudheer Kumar Dwivedi chuan vawiin leh naktukah hian Mizoram hmun thenkhatah ruah a sur an beisei thu a sawi.

Akashvani in a kawmnaah he thu hi sawiin vawiin leh naktukah hian an radar atanga a lan danin Mamit, Kolasib, Aizawl leh Champhai chhung hmun thenkhatah ruah tam lutuk lo a sur theih thu leh tek tla a ken tel leh hmel thu a sawi a. Thli na lutuk tleh tura hmuhlawk an neih loh thu sawiin thli na hlauhawm tur a awm an rin loh thu a sawi a ni.



FERTILISER

Sorkarin a bithliah man aia toa lei tha hralhtu chu Mizoram State Agriculture, Horticulture and Marketing Cooperative Federation (MAHFED) Ltd. in insawifiah turin a hriattir.

MAHFED Ltd. chuan thu dawngin Sihphir leh a chhehvelah, Fertilizer (Control) Order, 1985 kalhin urea hralh ruk leh dan lova pek chhuah a awm ni a hriat a ni a. He thudawn bawhzui hian, Managing Director, MAHFED Ltd. chuan, Sihphir-ah thla hmasa ni 20 leh ni 23 khan khan a hmunah enfiahin lei tha pek chhuah a nih dan zirchiangin kut hnathawktute a kawm bawk a.

Heng inkawmna atang hian sorkarin a mamawhtute tana lei tha, urea man tlawm zawka a pekchhuahna kg 445 a rit bag khat cheng 260.40 man chu a aia sang, cheng 450 te a hralh a ni tih hriat chhuah a ni a. He thil hian Fertilizer (Control) Order, 1985 Clause 3(3) a kalh bakah Essential Commodities Act, 1955 hnuai ah hrem theih a ni a. he thil ah hian M/s Zekyl Enterprises chu an inhnawih nia hriat niin, he enterprises hian Fertilizer (Control) Order, 1985-in a phut lehkha pawimawhte pawh a neilo ni a hriat a ni a. Hei hian Fertilizer (Control) Order, 1985 Clause 7 a kalh bawk a ni.

Heng zawng zawng thlir chung hian MAHFED Ltd. chuan hma la nghal in, Cooperative society hnenah hian show cause notice a pe nghal a. Thuneitute nen tang rual in M/s Zekyl Enterprises in dan Kalha hma a lo lak tawhnate chhui zui nghal a nih bakah, arang thei ang ber a dan kalh a hmalakna awmte tih tawp leh dan kalh a che nia hriat te chung a dan ang tak a hmalak dan tur a ngaihtuah nghal bawk a ni.



REVIVAL

Mizoram Presbyterian Kohhhran te chuan vawiin hi Harhna Thlen Ni atan hmangin kumin hi a kum 120 na a ni.

Kum 1982 Synod Inkhawmpui chuan Mizorama harhna thlen hmasak berna ni, April Ni 4, 1906 chu Mizorama Harhna Thlen Ni atan a pawm a, a hman dan tur

pawh Synod Executive Committee kutah a dah a. Kum 1984 atangin kum tin April Ni 4 hi 'Harhna Thlen Ni' tiin Kohhran ni pawimawha chhiar a ni ta a. Kum 2006 kha harhna thlen kum 100 na niin lawm a lo ni tawh bawh a ni.

